



書店關忒咧

在一隻位所戴久，滿哪仔就當熟絡，哪位有麼个好食、哪位有麼个搞、哪位有麼个好買，心肝肚總係有一張真真个地圖。照等這張地圖行，愛買麼个、食麼个都毋會尋毋著。毋過，這張地圖也會有出差錯个時節，下把行行仔、行行仔，應該出現个店仔嘎毋知走哪位去咧，問人正知店仔關忒咧。

這恁久來，店仔關忒無開毋係麼个大消息，因為這五年來總共有兩百零隻店仔關忒咧，有个係大旅社、大餐廳，也有个係遊樂區、百貨公司，其中還有經營幾下十年个老店仔，聽著實在難過。毋過，最分恁痛心个係後生時節長下去个書店關忒，因為裡背有恁淄淄个回憶，也有恁留在該个青春腳跡。

恁細人仔該下戴在莊下个街路，在該五、六十年代時節，街路肚雖然開有盡多店仔，毋過大體係賣食个點心店、賣用个雜貨店、賣著(zhog)个布店。到初中來到城市讀書，正式像大山巔來到「花花世界」，麼个就恁新奇。電影院、唱片行、書店係該時最錫恁个位所，尤其係書店，在這恁看當多世界名著、古典小說摻現代散文，跔等作者在古時現代、中國西洋穿梭，為著書肚人物个喜怒哀樂、悲歡離合牽腸掛肚，幾精彩、豐富个日仔啊！當多學生仔摻恁共樣，背等書包仔企在這看書。書店个頭家人盡好，毋會迫人走，也毋會分面色人看，大家安然自在在這享受看書个快樂。當然，恁當多零用錢乜繳分書店，買轉來一書架个書，恁好看書个習慣也係恁樣養成个。記得恁做學生仔該下想法當單純，斯因為無恁多錢買書，就想下二擺大咧一定愛開間書店，歸日做得免費看書看分佢值(dad)。雖然背尾開書店个願望無達成，好得个係，看書个習慣一直無擢忒。

書店除了看書、買書以外，也係約人、等人个好地方，一頭看書、一頭等人，一滴斯毋會試著時間難耐。但係恁好个位所，也難抵擋時代个潮流，這下人閱讀習慣改變，電子書緊來緊多，當多人在網路頂看書。也有盡多人貪方便，在電子商店定書、買書，加勝店仔个租金又緊調緊高，這種種原因，書店經營毋下去，最尾就係關忒毋開咧。書店關忒係盡打爽个事情，因為書店對文化个推廣，有佢个重要性摻價值，一隻城市係無書店就無文化，無文化个社會就毋係進步个社會，係毋係大家愛來支持恁个書店呢！

作者：張美容

☆詞彙學習☆

【迫人走】dui` ngin zeu`：趕人離開。

【穿梭】con` so`：來來往往。

【大山巔】tai⁺ san` ngong`：山裡來的土包子。【加勝】ga` shin`：加以、加上、更加。

☆文法學習☆

【幾精彩】gi` zin` cai`：多麼精彩。「幾」因為語氣的不同有二義：1.感嘆詞，「多麼……」的意思，通常念本調 gi`；2.疑問詞，「多少」的意思，常會連音變調念成 gi⁺。

例1：這擺个運動會幾精彩哪！（這次的運動會多麼精彩啊！）

例2：這擺个運動會有幾精彩？（這次的運動會有多精彩？）